

Donec ponam inimicos tuos, * scabellum pedum tuorum.

Virgam virtutis tuæ emittet Dominus ex Sion : * dominare in medio inimicorum tuorum.

Tecum principium in die virtutis tuæ in splendoribus sanctorum : * ex útero ante luciferum genui te.

Juravit Dominus, et non poenitebit eum : * Tu es sacerdos in ætérnum secundum ordinem Melchisedech.

Dominus a dextris tuis, * confrégit in die iræ suæ reges.

Judicabit in nationibus, implebit ruinas : * conquasabit capita in terra multorum.

De torrente in via bibet : * propterea exaltabit caput.

Psalmus 111.

BEATUS vir, qui timet Dominum : * in mandatis ejus volet nimis.

Potens in terra erit semen ejus : * generatio rectorum benedicetur.

Glória, et divitiæ in domo ejus : * et justitia ejus manet in sæculum sæculi.

Exortum est in tenebris lumen rectis : * misericors, et miserator, et justus.

Jucundus homo qui miseretur et commodat, & disponet sermones suos in judicio : * quia in ætérnum non commovebitur.

In memoria ætérna erit justus : * ab auditióne mala non timebit.

Paratum cor ejus sperare in Domino, & confirmatum est cor ejus : * non commovebitur donec despiciat inimicos suos.

Dispérsit, dedit pauperibus : & justitia ejus manet in sæculum sæculi, * cornu ejus exaltabitur in glória.

Peccator videbit, et irascetur, & dentibus suis fremet et tabescet : * desiderium peccatorum peribit.

Psalmus 112.

LAUDATE púeri Dominum : * laudate nomen Domini.

Sit nomen Domini benedictum, * ex hoc nunc, et usque in sæculum.

A solis ortu usque ad occasum, * laudabile nomen Domini.